

廣靈縣誌卷之六

政令誌

誌書載鄉約臥碑詳文均無補誌外惟有告示條約
屢奉

列憲頒發爲地方民生計宜永遠遵行者並補誌之

禁栽種罌粟示

同治三年

督辦山西籌餉總局

司道

爲嚴禁栽種罌粟以重農

務而挽頽風事照得稼穡維寶五穀爲養命之源耕
織傳家三農實務本之業晉省風俗樸厚民間習於
勤儉非貿遷爲業卽專事力田一切非分之財從不

妄求乃自洋藥弛禁以來小民無知因見栽種罌粟
之利較五穀稍厚遂視爲利藪始而山坡水湄偶爾
播種近則沃土肥田種植日廣以致糧食漸缺糧價
日增獲利目前貽患日後殊不知農田之利民食攸
關多種一畝罌粟卽少收一畝米糧在豐收之歲有
無相通其害尙未盡見設遇水旱偏災閭閻毫無積
穀空握藥料無救饑寒悔之何及查藥料本出自外
洋一自流入中國傷生廢業爲害不可勝言若再處
處栽種家家收藏子弟無知見其來路較易視爲尋
常茶飯自必傳染更多其禍伊於胡底且收漿時婦

人女子成羣結隊露面出頭害民命而傷民風莫此
為甚亟應嚴行禁止除分飭各州縣認真查察實力
嚴禁外為此示仰闔省軍民人等知悉嗣後務須各
安本業專務農田切勿再種罌粟致礙民食並責成
公正社首村頭糾首鄉地人等互相稽查輾轉勸誡
儻有愚民圖利復蹈前轍任意栽種准由社首鄉約
以及地鄰人等稟官究治儻敢通同徇隱一經地方
官查出或別經發覺定將該社首地鄰一併懲處本
司道為慎重民食起見顧慮深遠用不憚諄諄告誡
各宜懍遵毋違特示

此由撫憲沈始
奏奉諭旨飭禁

廣靈縣補誌

卷六 政令

二

禁種罌粟示

光緒
三年

巡撫爵部院曾 會同

欽差稽查山西賑務前工部右侍郎閻 為曉諭事案據

晉省公正紳耆條陳晉災請禁栽種洋煙以裕民食
等情細繹文內事理誠備荒之要圖足民之至計本

部堂
爵部院

無德以感召天和致爾百姓流離失所清夜

捫心深自慚懼惟念天災流行古所未有何以二百
年來未聞如此慘酷推厥由來皆因近日廣種罌粟
家無蓋藏之故大約種罌粟之害有三多種洋煙則
少種五穀一也人力盡驅於罌粟五穀反荒蕪而不

治二也業已種之因而吸之三也道窮則變人窮返
本想爾等今日當自知悔悟矣試思可悔之要亦有
三端查晉省二十年前吸洋煙者大抵皆游手無賴
門丁胥役與夫殷實有力之家至於用力南畝之百
姓則絕無其事乃自徧地栽種以來取攜過便以致
父不能防其子兄不能制其弟夫不能禁其妻不分
男女不論少長昔之勤於稼穡者不數年而成游惰
矣又不數年而爲盜賊矣家計旣虧風俗大壞此爾
等之可悔者一也想爾等栽種時非不知將來身被
其害家受其累祇以比種五穀可多得錢目下值此

荒年爾等何不取平日所得之錢以自餬其口今則
銀米兩空束手無策此爾等之可悔者二也聞前十
餘年州縣官有包庇罌粟不認真禁止者爾等便以
爲好官殊不知此等地方官並非好意不過私地按
畝收稅可自充囊橐而已彼以其禍在將來目前且
以毋動爲宜落得做個好人今則做好人者袖手旁
觀做好官者滿載而歸惟爾等無從訴冤甘受餓死
而不能逃此爾等之可悔者三也此次民間吸食洋
煙者大半卽於餓莩爾等有目共覩有耳共聞天心
仁愛降此大災挽回劫數使爾等翻然改計爾等豈

獨無悔心乎爾等平日以爲墾粟業已徵收畝稅此
次何以禁人栽種本部堂已嚴札州縣官不准徵
收畝稅今與爾等約定民間再有栽種墾粟者必按
律懲辦向日栽種最多之處如垣曲岳陽隰州蒲縣
遼州和順黎城忻州崞縣五台興縣嵐縣永甯山陰
懷仁各處經此番曉諭自當猛力回頭又太谷之范
村交城之胡盧峪向日曾有抗官之事口外七廳栽
種墾粟數百里一望無際萬不可自恃人多勢衆意
存梗化如能以種墾粟之地改種五穀非特祛除大
害並可多活民命爲利於地方者無窮自示之後如

有州縣按畝收稅者許民間首告立行參革仍將所
收之稅充賞首告之人爾百姓一族中有種煙者責
成族長拔除一甲中有種煙者責成甲長拔除爾等
務須糾約族甲人等極力開導認真稽查其未種者
力爲禁絕有已種者立即改種五穀如花戶人等抗
不聽從准該管族甲長等稟官究治本部堂仍不
時遣人到處密查儻有仍前栽種者除將種煙本戶
嚴行治罪並稽查不力之地方官分別撤參外定將
該管之族長甲長立予重懲本部堂言出法隨決
不寬貸其各懍遵毋違特示

附錄 溫洗馬戒吸食鴉片栽種罌粟說

客有問於主人曰三晉承唐俗之遺山河表裏素稱饒富之區而近年荒旱頻仍死亡徧野少壯散走於四方老弱待斃於牖下望赤地而人稀廣陌閃青燐而鬼哭荒原甚至舉室輕生闔門仰藥傷心慘目蔑以加焉因思三晉之民風俗勤儉不聞有大罪孽天胡爲而降此鞠凶者主人曰是蓋有故請申其說書曰天作孽猶可違自作孽不可逭夫所謂 孽者何則吸食鴉片栽種罌粟是慨自鴉片之流入吾晉也在豪富之家不過浪擲其金錢傷殘其筋力禍在

一身者姑不具論而中人之產寒素之門歲入無多一人吸煙歲需數人之食數人吸煙歲需數十人之食縱使時和年豐尙難自給況歉歲乎精力素強者不數年而疾病漸增矣衣食素裕者不數年而資用漸乏矣耄老無成飢寒交迫西山日薄飲恨而卒者可勝道哉然此猶在平康無事時也若夫出門謀斗米數千日不能謀兩餐煙更何能飽吸 出門謀食則病已日臻欲在室忍飢則命難自保此求生愈遠求死愈速之明驗也語曰民生在勤吸煙而能勤事者幾人不習於勤而習於惰其不上干天怒者幾

希矣至若栽種罌粟則其害更有甚焉者按吾晉土田誌書所載四十九萬五千九百三十四頃今自罌粟盛行每縣之田種罌粟者不下十之三四合全省土田計之應占十五萬頃是皆膏腴之田也以一畝得糧一石計之罌粟所占之田歲缺糧一千五百萬石合十年計之則缺糧一萬五千萬石天與人以土田使之耕種以養其生而人乃植此流毒之物以戕其生積習相沿日甚一日吁嗟上蒼能不降災以示警哉客曰此利之所在衆必趨之如之何其勿種主人曰試思乾嘉之間鴉片未入中國其時家給人足

果無美利乎方今猝遇凶荒死亡疾病子不能保其父母夫不能保其妻子前數年所得罌粟之利又安在乎然則罌粟之利目前之小利也隱微中之大害也貪小利而忘大害其自爲謀也亦不善之甚者矣今日者天心未可逆料人宜悔過以迴天

國家開浩大之恩尙不足支半年之食倘再遇凶荒三晉之人民何以自保可不畏哉可不懼哉今年幸逢春雨允宜徧插嘉禾勿再栽種罌粟以罹慘毒之害庶幾數年之後千倉萬箱民食足而根本固也客喜曰敬聞命矣主人之言善

附錄 溫洗馬勸戒鴉片歌謠

鴉片煙來自西洋是中土人民害一場不論那香車
寶馬富家郎就是貧寒之子也要嘗嘗不論那豪華
男子逞剛強就是兒童婦女也要聞香昔日个相貌
堂堂今日个骨瘦支離成何模樣昔日个金銀滿箱
今日个家業全飄蕩只說是借煙治病免災殃誰知
道病己入膏肓遇豐年尚可支持門戶享安康到而
今穀貴年荒可憐你土丸石粉怎樣飽飢腸可憐你
賣兒鬻女怎樣別爺孃可憐你空鍋一口架在荒廚
上土竈無柴暗火光咳嗽飢寒已不支還有煙魔障

輾轉支吾病在牀想當初教喫煙的良朋好友今日
在何方誰管你半升米誰管你半斗糧誰管你一命
歸泉壤歎大地茫茫叫不醒的癡迷受不完的罪
算不了的循環帳都入了這喫煙人的勾當西望雲
山蒼莽哀鴻徧故鄉休怪俺出言無忌近荒唐願諸
君睡到五更頭猛然思想仔細評量

附錄 溫洗馬勸戒種罌粟歌謠

罌粟花滿大田紅紅白白相連貫栽徧了南畝東阡
一畝花二十千農夫重利愛金錢把一座舊唐封變
了河陽縣多年的水澆地不種麥不種豆不種穀徧

要種洋煙只說是美利無邊誰知道暗把倉儲減遇
豐年此害全然不顯到荒年五穀從何見害的你家
不保身不安害的你父母不能養害的你兄弟不能
顧害的你妻子不能憐癮大的早已一命赴黃泉癮
小的道途乞食無人管若非

皇恩浩蕩性命早摧殘消費了

皇家萬萬也養不得數百萬生靈到一年勸衆人心宜定
志宜堅莫負那當官父母心莫負那

聖代殊恩典種田的須要勤有癮的須要戒人定自迴天
男耕女織從古爲然請問只罌粟花載在農書第幾

廣靈縣補誌

卷六 政令

八

篇當此飢寒難免若掉得轉頭來便是英雄漢安排
打點五穀最爲先從今後舍去這害根苗管教你甘
雨淋漓大有年

其二

爲恭錄

上諭並抄原奏通行曉諭嚴禁事照得光緒四年二月初
四日內閣奉

上諭閩 曾 奏申明栽種罌粟舊禁一摺民間栽種罌
粟大妨農食屢經嚴行禁止無如積習相沿每貪利而
忘害如山西省地半礮瘠產糧本不見多又不按畝力

耕私栽罌粟民間既少存糧一遇荒歉盡爲餓殍該省
此次慘罹旱災創鉅痛深當知變計嗣後務須盡力農
作期於穀產充盈凶荒有備閩 曾 現已出示曉諭
所有栽種罌粟者責成族長甲長押令拔除改種五穀
如花戶人等不遵稟官究治知情徇隱者罪之州縣官
吏私徵罌粟畝稅立予參撤各節均着照所議行並着
各省按照此次章程一體嚴行查禁庶幾興利除害閩
閩共樂豐登毋再蹈從前覆轍將此通諭知之欽此
計抄原奏

奏爲申明栽種罌粟舊禁以裕民食而備凶荒恭摺會

廣靈縣補誌

卷六 政令

九

陳仰祈

聖鑒事竊聞古者救荒於臨時而實備荒於平日是以耕
三餘一耕九餘三雖有旱乾水溢民無菜色從未有
自種害人之物流毒於桑梓地方者也此次晉省荒
歉雖曰天災實由人事自境內廣種罌粟以來民間
蓄積漸耗幾無半歲之糧猝遇凶荒遂至無可措手
小民所恃以足食者有三曰天時曰地利曰人力伏
查晉省地畝五十三萬餘頃地利本屬有限多種一
畝罌粟卽少收一畝五穀小民因獲利較重往往
膏腴水田徧種罌粟而五穀反置之礲瘠之區此

利之所以日窮也未種之先吸煙者不過游手無賴及殷實有力之家至於力耕之農夫絕無吸食洋煙之事今則業已種之因而吸之家家效尤鄉村反多於城市昔之上農夫浸假變而爲惰農矣又浸假變而爲乞匄爲盜賊矣查罌粟收漿之際正農功喫緊之時人力盡驅於罌粟良苗反荒蕪而不治此人力之所以日弛也地利旣差人力又減因而時之在天者上熟僅得中稔中稔便若無麥無禾一遇天災流行遂至疲茶而不可救藥臣等竊觀晉省形勢南路重山複嶺絕少平原北路固陰沍寒每憂霜雹縱令

全行播種嘉穀已不足給通省卒歲之糧况復棄田之半以種罌粟民食安得不匱省北大朔代忻及歸化七廳向來產糧尙多每年秋後糧販自北而南委輸絡繹不絕近至省城遠踰韓侯嶺昔年太汾二府米價低昂恒視北路之豐歉爲準由包頭一路循河而下直達蒲絳近則罌粟盛行北路沃野千里強半皆種此物畎畝農夫吸煙者十之七八民間旣少存糧採買立虞米貴此北路已種罌粟而今昔不同之情形也至於南路平蒲解絳以陝西米麥爲大宗汎舟之役自古稱盛乃自回匪削平以後種煙者多秦

川八百里渭水貫其中央渭南地尤肥饒近亦徧地
罌粟反仰給於渭北夫以雍州上上之田流亡新集
戶口未甚繁滋而其力竟不足以自贍平蒲解絳糧
乏來源更成坐困之勢此西路已種罌粟而今昔不
同之情形也北路之來源既少西路又自顧不遑
向東南東陽關獲鹿一帶越太行而議轉輸腳費浩
繁十倍糧價漕轉業已力盡而餓莩依然盈途民焉
得而不困夫人窮莫不返本遇變必求其通居今日
而欲爲晉省久遠之計非申明栽種罌粟舊禁不可
惟民間相沿已久若專以此責之州縣既恐一州一

縣之大牧令難於徧察且虞值此荒歲蠹役姦胥因
緣擾累_臣等往返函商莫若出示令民間宗族房親
鄉約里社自相鈐制庶免衙門書差需索舞弊一族
之中有種罌粟者責成族長率子弟拔除一甲之中
有種罌粟者責成甲長押令拔除立即改種五穀以
收東作西成之效如花戶人等意存梗化准該管族
長甲長稟官究治如族甲長知情徇隱則罪其族長
甲長如州縣官吏據爲利藪私自徵收罌粟畝稅一
經查明立行參撤現已刊刻告示分頒各屬徧行張
貼_臣等不時遴選士類到處稽查倘有仍前栽種者

准地方公正紳耆及族中品行端正者將種烟花戶
秉公議罰以備里社之荒並准據實控官究辦庶民
間自相約束耳目最近覺察易周而衙門殘害鄉里
之弊亦可稍除_臣等爲晉省將來充裕民食預備凶
荒起見是否有當伏候

聖裁理合恭摺會陳伏乞

皇太后

皇上聖鑒訓示謹

奏等因除通行各屬遵照外合行恭錄

上諭並抄原奏出示曉諭爲此示仰軍民人等一體懍遵

廣靈縣補誌

卷六_{政令}

十二

毋違特示

又勸戒吸食鴉片煙諭_{同治十一年}

巡撫部院鮑 爲洋藥流毒無窮剴切勸戒以拯愚
民事照得天生物產有養人之物卽有害人之物然
害人之物人皆知遠而避之獨至鴉片煙一物視
毒爲膏梁盡人趨之迷而不悟此千古以來未有之
奇害可爲流涕痛哭者也鴉片自前明始入中華本
爲藥料我

朝道光年間漸有竊食者延及近年各省盛行而莫如晉
省最甚本部院下車伊始聞通省吸食之風無論鄉

堡村莊到處皆有煙館不問男婦老幼盡人多有煙癖以爲風氣之類至斯已極若不亟加挽救伊於胡底第思積習相沿已久驟繩之以法不若徐導之以言用是剴切提撕指其毒害臚爲七條以當鐸警一日耗資財晉地食用價昂倍於他省中人之產八口之家已費經營若再吸食鴉片每日購買煙土加以無名等費更添數倍况一人食之闔家必相繼食之朋友疊相往來共食之每年於此項無益中花費多少冤錢中人之產已耗過半矣若貧者食之費從何出到窘急時非爲匪作竊只有待死而已何其愚哉

二曰害性命煙膏生食入口殺人與砒無異今若以砒熬成煙膏人未有肯吸食者獨至鴉片甘之如飴殊不知此等毒物其性燥熱雖燒之成煙毒性自在初食若不見其害暗中耗血損氣朝夕食之薰灼臟腑煉枯精液漸至骨瘦皮焦背駝肩聳久之有因積毒在腸變成煙痢者有因下元提空驟然虛脫者煙病一發百藥無靈每見極壯之人不數年轉於溝壑卽或苟延旦夕亦鬼狀囚形奄奄待斃人孰不貪生何苦自尋死路哉三日壞家風人無嗜好則精神充足早起晏眠雖家事瑣屑必能逐條整理門庭可使

肅然若一嗜煙更深夜半廝守一燈輾轉牀頭百事不問次晨日已過午猶在睡鄉夫主人高卧合家焉肯早起其中婢媪之盜竊奴僕之轉運無所不有甚且招引匪人入室情事更有不可問不忍言食煙者多試一思之能不寒心乎四曰絕後嗣凡人食煙者多藉治病爲詞天果能治病何以生癮一至有癮是前病未除又添一病矣且食此者多誘妻妾共食之蓋惟恐從旁交謫引之上道堵塞其口迨至同歸迷途煙狀支離往往男女未至中年已絕生育之望亦有偶然生子而胎元不足胎毒已深生子必多不育嗟

乎斬嗣之罰最重人何苦爲此區區嗜好而令祖宗之血食立斬吾不知其死何以見先人於地下也五曰禍子孫凡人縱不成材夫有不盼子孫出人頭地者惟食煙之人雖欲子孫成器而不能蓋其相習成風子孫幼時目所睹者無非吸煙之具耳所聞者無非吸食之語其來往近習者無非游手好閑面目可憎之煙鬼正人君子固望風遠避卽稍知自愛者亦不肯輕入其門到此地步子孫將何所取法乎是以食煙者之子孫未及長成家法傳授早成大癮由是遞相傳染禍延數世女若出嫁更染及煙親其流毒

可勝言哉六曰喪品行世間品之最壞者莫如嫖賭吸煙較嫖賭更甚何也嫖賭雖壞品行一經收心猶可立止若食煙致癮欲止不能富者嗜此百務廢弛而轉爲貧人貧者嗜此吸食無資而漸就死地更有罪孽未滿求死不得煙癮發作十分難熬年少子弟甘心流入匪類而不恥有妻室者逼令倚門戲笑而不羞甚至或攘或竊縱罹官刑牢獄之災而不顧無非由煙癮逼迫而成之也豈不深可悲哉七日廢正業士農工商各有正業若人徒抱煙具晝夜昏沈更何有真實精神能作正事士人食煙曠爾學業隳爾

聲名困而無成終身難謀好館卽幸而發達他日亦難做好官農工食煙心懶身惰田園荒廢技藝生疎商賈食煙錯誤事機爲東者難望尋錢爲夥者難求薦業至於胥吏兵丁一食洋煙或廢公事或悞差操定遭責革尤可異者肩挑貿易小本營生日覓蠅頭耗於煙館老弱飢寒就斃妻子困苦輕生鰥獨終身漸成乞匄無非煙之一字誤之也以上七條皆食煙者確切要害逐層揭出俾各觸目警心試問吸煙有何真樂而其害至於如此奈何趨之者陷溺沈迷而不知返也至於栽種罌粟爲害尤深食爲民天古聖

人所以開耒耜之利若以膏腴之產盡種酖毒之苗
十數年後地方只有鴉片而無稻粱合省之民食將
安出目前之利雖種花勝於種穀他日果能舍五穀
而以鴉片養生乎言念及此稍有知識者當亦爽然
矣本部院具一片婆心不忍爾民沈淪煙劫特反覆
開導以拯愚蒙爾民務各激發天良痛加改悔卽尋
覓戒癮諸方癮大者限以半年癮小者限以三月種
罌粟之地一律拔除庶幾永斷嗜好之根同登仁壽
之域是則本部院日夕殷殷切盼者也倘半年後仍
不知愧奮吸煙種花錮蔽如前真是冥頑不靈無足

愛惜本部院只有執法從事決不寬貸各宜懍遵慎
毋負諄諄告誡之苦心也特諭

十條教養示

光緒三年

巡撫爵部院曾 爲剴切曉諭事照得豐歉者氣候
之不齊衣食者民生所日用然則欲預謀救荒之策
非廣求種植之方不可飢寒迫於民之肌膚而姦宄
不作者古未之有況今日乎本爵部院恭承

簡命來撫晉疆甫及下車正逢災旱觀風問俗不得不溯
其本源救弊補偏尤當先拯其疾苦三年莫沛霖雨
百姓日卽阡危殆天心之示警人事之多乖歟抑農

力之稍疎地利尙未盡歟是皆未可知也守土官有教民養民之責將欲教之趨於善必先示以養之之術以阜其生自昔賢守宰勸民樹藝下令植桑國以大饒豈非因民之所利而利之俾吾民得以世享其利而不替也乎查晉省地廣山多物稀土曠誠能辨高下燥溼之性因地以制宜察滋生土物之臧相時以播種如栽棉花植桑茶樹材木南方添種大麥北路增播秋禾等類雖遇小旱可以無飢較之採買於鄰封仰給於秦豫陸路轉輸貴賤豈不懸歟經曰旣富方穀傳曰倉廩實而知禮節又曰民生在勤勤則

不匱爲今之計盡人事以弭天災培元氣以扶正氣是誠在上在下之所宜共圖而不可須臾緩也吾於斯民有厚望焉

一士習宜砥礪也晉稱沃野千里代出名臣何以近日士氣柔弱三年大比鄉試不過四五百人院府考試一縣不過數十人推原其故或由於士不自尊以致民不重士夫士不自尊不足以矜式一邑則謀生最難民不重士不奉爲楷模一時則後知誰覺以貿易而致富其子若孫不克以詩書爲法律以禮義爲防閑則其富終莫之永保也如肯羣務讀書立志希

賢生子七歲卽令其入塾從師愚者多財則不得益其過賢者多財則不得損其志六經四書之垂於世宙譬如日月之經天江河之緯地人生不可須臾離耳四書者六經之階梯也宋五子近思錄又爲四書之階梯前明呂子呻吟語國朝陳文恭公五種遺規又爲近思錄之階梯學者不可不留心體察以崇正道道理旣明則通儒碩學可企而幾也書香世澤發跡久長汝等獨不勉而慕之乎誠能專相勸導吾見士風自此蒸蒸日上矣

一倫理宜克敦也晉省薰陶舊俗怨慕誠喜之風理

宜垂於萬世惟孝格天聖有明訓乃者歲屢不登豈民間孺子天心或漸澆漓歟抑官不克化道致多服制之案歟孝弟乃爲仁之本友于卽盡孝首見之端大凡孝友之家無不獲天庇佑報應之理昭然不爽若常腹誹其所生視同胞如行路倖免人罪能無鬼責可不慄然歟吾願晉民亟宜講求父慈子孝兄友弟恭家庭有親睦肅雍之象通省釀和風甘雨之祥此挽回劫數之第一要術也

一祀事宜勤修也古者大夫祭三祀庶人祭先祖祭竈載在經典萬世昭垂覺世眞經訓人剴切首曰敬

天地次曰禮神明奉祖先良以神之於人無微不察人能常存敬畏之心息息與神相通可以寡過可邀錫福則水旱疾疫天札之災自然不作惟天陰隲下民先佑彝倫攸敘之家又曰奉先思孝又曰惟天降災祥在德可見天無私覆地無私載惟德是輔全在乎一念之克敬而已查晉省風俗除元旦敬神敬先外每月朔望及薦新薦食等類均闕焉不修人慢則神怒宜乎雨澤愆期也至若婦孺以污穢觸天農工逢戊社而動土均干天地之忌能召沴戾之災燕知戊己能避忌也烏亦返哺能報恩也可以人而不如

烏乎仰軍民人等務宜心存報本各慎慎終追遠之誠毋忘木本水源之義庶幾神安而民樂可旦夕立見奇效也

一停厝宜申禁也古者士庶人逾月而葬未聞有遲至數年十數年者自風水之說惑於愚衆之耳目於是有藉親骨以邀福者矣自厚葬之俗淆於一時之人心於是有積鉅資以待時者矣不知祈福在於修德厚葬反致遺殃今貧者以力薄而不能葬富者又以擇地而不速葬以致室停數棺棺積數世迨至子孫式微拋置原野暴露郊關亡者既不能獲覆土之

安存者焉能望所生之蔭積四方之怨氣成連年之災荒似亦乖氣致戾之一端也今欲感召天和必須先盡人事願汝居民傳諭村里及時慎葬垂爲風俗是爲至要

一筋力宜勤習也晉爲名邦常守勤儉之遺風居民自奉刻苦天下皆莫能及萬室之邑除二三鉅富習染奢侈外莫不如苦忍饑以度日然儉則儉矣而於勤之一字則猶未講也或黎明而未起或白晝而偷閑或率子婦以嬉遊或羅鳥雀而玩好優忽惰荒不勤可知試思戶樞胡爲不蠹以其勤轉而耐久也流

水胡爲不腐以其流動而常新也輪不運則車不行柁不移則舟不轉蓋言動則有功不動則罔效耳自卿大夫至士庶人立身持家咸類於此未有不以勤而克興以怠而致敗者人之精神平旦清明嚮晦則莫能振昔賢所以有朝氣銳暮氣惰之說也耽於習慣則氣力微雖拱把不能舉也勤於操作則筋絡強雖百鈞之重無難運之於掌上運甓習勤賢哲且然矧茲民庶豈得暇逸自安仰軍民人等務宜黎明卽起各勤職業農則索絢播穀軍則制挺執戈致富在此衛生亦在此上可報效

國恩下可捍衛閭里其爲益豈不大哉

一鄰里宜和睦也古者鄉田同井有相友相助之誼今之同里而居者比比皆是然貧富相濟有無相通者幾人哉軍興以來富者益少貧者益多富者存積餘資莫不從艱難辛苦得來貧者謀生乏術時乖命舛難保無缺望之私况當荒旱頻仍惟有束手待斃全仗富民顧念桑梓之情上體天地好生之德慷慨或責以後日受值或約以豐年取償多救同里垂危之命勿守一毛不拔之規結今日之善緣種後來之福澤功德定卜無量願汝等勉力行之以厚風俗

一蠶利宜講求也晉省潞澤出紬平陽出黃絲絹非不宜於蠶也吾觀五畝之宅牆下之桑正復寥寥殊不知養蠶之利無礙農工浙江富甲天下比戶繭絲荆蜀利普一時緣隄種樹此乃自然之利與人無忤與世無爭者也今晉省若擇其宜桑者咸於春分以前採取柔條分植村落旁近左右不三四年即可望成林矣如肯年年添置不過十年卽徧地皆桑矣植樹旣繁蠶利斯廣豈非累世之業乎十年樹木致富在人願汝等亟切圖之

一棉花宜增種也地氣自南而北陽煦遠勝於十年

以前瘠土不長五穀曠地可種棉花直隸向無此種
乾隆年間官授棉花之圖戶通紡織之藝至今利
千里陝西朝邑沿河一帶種花者多得利亦厚惟北
方初次種花必須取上年棉花樹根浸水蓄於溝渠
用資灌溉則次年可望花實纍纍願汝等創始之初
依法澆種勿憚煩勞

一女紅宣勤習也晉省種棉既少其布匹多採自鄂
豫織織女手不知紡織之源流除隨同丈夫兒子原
隰力耕外間或編草爲帽日獲數文不敷口食甚至
終年不得一飽者此不知蠶桑紡織之利爲婦女專

習之業也近聞蒲州一帶頗能諳習但紡車用手而
不用足較南方力倍功半若使通省婦女普利蠶桑
均勤紡織十日半月可成絲布一匹獲利當倍於前
大可補助薪米之資偶遇荒歉不至流離失所各郡
各屬居民若能實力遵行其富饒可立俟也

一山林之利宜預謀也晉省重山複嶺望之童然幾
無一株一木之植豈果山之性不同歟抑人力尚有
待也天生五材闕一不可木主於春其德爲元在天
象則爲歲星在吉曜則爲生氣所繫不綦重歟夫不
宜於作甘者未必不宜於曲直也桐漆山櫟皆有自

然之利桃李棗栗咸有結實之仁至於種藥於園植
茶於坂任勞在一二歲之前收效在兩三年之後無
論智愚莫不周知爲其事而無其功者則未之有也
又如忍冬藤其花爲金銀花春種而夏榮最爲易生
之物佔地不廣費功不多其花與藤與根均能解毒
如於牆角籬邊多爲種植採花與藤與根煎水當茶
令小兒隨時飲之則痘毒可以潛消默化永無險痘
之虞此亦保赤之一端也盍試仿而行之其各體遵
以副厚望至於設午痘局爲民間嬰兒點痘則仗各
縣官爲經理不 望於吾民耳

以上十條係爲教養起見道則倫常日用事則言近
指遠如能分條逐件及時遵行則晉省豐亨之預兆
可復昔日之盛規各宜懍遵毋違特示

舉辦

助諭

同治十三年

巡撫部院鮑 爲諭辦守助以安閭閻事照得本部
院下車之始卽諭令各州縣編查保甲並頒發章程
各條令轉行勸諭民間切實遵辦在案嗣據各屬稟
稱爾民等以其事簡而易行均已樂從辦理因思保
甲爲承平時安民善政守助尤保甲中自衛要端現
在北路馬賊未清甘隴事平又值各路裁撤勇營之

際誠恐該勇丁良莠不一未能盡歸本籍或致逗遛散處擾害地方亟應於保甲中講求守助以期戢強暴而安 閭所有舉辦守助事宜酌擬數條開列於後

立團總

每十家一牌立牌長一人十牌一甲卽爲一團立甲長一人亦稱團長又副團長一人均聽民間自行公舉稟知於官一鄉中或十數團或數十團均合爲一大團立團總一人副團總二三人

相地面大小
定人數多寡每一

州縣分五大團城中爲中團四鄉分四團其團總副

總均以公正紳士爲之由官選派有不妥者聽官黜退另派不得由紳士自充團中公事團長商明團總辦理有重大事情稟明於官辦理團總團長但准其專司團務不准干預地方一切公事並不得藉團務苛派鄉民

挑壯丁

卽在保甲十家牌中挑選除孤寡無壯丁之家外無論士民工賈每戶出壯丁一人有不能勞力者許以顧工代之須年在五十以下十六以上者計十家中或出丁十人或出丁八九人就中派一人爲隊長領

之

十家中原有牌長但牌長專司稽查隊長則於壯丁中選一人執旗械領隊故須另派如牌長能兼

充聽便

刀矛鎗銃各就所長練習平時各安各業歸牌

長稽查有事聽團長調遣並於十隊中加派一人為

百長領之

一團中有團長亦專司稽查百長則執旗械領百人之隊故須另派

一月之

中約一定期聚一團之衆丁會哨一二次一季之中

又合附近各團之壯丁會哨一次以聯衆志兼壯聲

威

執旗械

每一鄉為大團製大方旗一面書某州縣某鄉守助

總約字樣每一甲為小團製大尖旗一面書某州縣

廣靈縣補誌

卷六 政令

二十五

某鄉第幾甲守助約字樣每一牌製小尖旗一面書

某州縣某鄉第幾甲第幾牌守助約字樣以布為之

顏色不拘 豎立於城門口村口街口要處其器械

除家存農具並尋常應用刀斧等器外如有舊存防

狼防夜之火鎗火銃矛桿大刀之類准其呈驗到官

加火烙印記帶回應用非追捕游勇盜賊不得私自

擅動如敢故違傷人者仍按軍器傷人例治罪

備梆鑼

團內人家各置一木梆又各置銅鑼若干面存放公

所如遇游勇盜賊入村本村梆鑼齊鳴團總團長一

面稟請地方官派役營汛派兵會拏一面傳令近處各團丁齊執器械奔赴盜所兜拏團丁齊聲吶喊助威鄰村聞梆鑼之聲接擊梆鑼以應之頃刻之間聲聞數十里遠處團丁雖不能盡赴盜所須齊出攔截要路彼盜賊聞梆鑼齊鳴先已膽落又見衆團齊集必將驚逃及至前途層層團丁攔截後面兵役團丁追及無不擒之盜賊矣盜已就獲送官究治不得私自責打惟擒捕時當場格殺勿論

安柵欄

游勇盜賊多騎馬馳突卽步行者亦躡捷善走必須有以攔截之各村鎮大街小巷多安柵欄入夜關閉派各壯丁輪班把守並派更夫來往梭巡使盜賊不能混入如有闖入者梆鑼一鳴壯丁齊集立將四路柵欄緊閉兵役壯丁四面兜拏盜匪奔竄無路不難立就捕獲有堡寨者修理完整更足防盜

齊心志

以上五條守助之事偕矣然必衆志成城方能得力游勇盜賊入境若有一人退縮不前則衆情觀望各不相顧必致盜燄益張殊不思盜賊游勇專以搶劫爲事今日搶東明日卽可搶西前日搶張後日卽可

搶李富家固有厚資貧家豈無薄蓄一經被劫彼此皆空甚至戕傷人丁污辱婦女受害更無分貧富何如齊心一志合力兜拏使此輩不敢相犯大家安堵爲樂蓋保人卽所以保己是在各團總團長剴切曉諭之如或村中有盜本村有一家壯丁不出及鄰村聞聲不往助者由團總團長公同議罰其甚出力者稟明地方官酌加獎賞

練膽氣

雖知同心合力而膽氣不壯終不免臨時畏怯團總團長須於訓練壯丁時教以常常注想游勇盜賊旣

至我村豈肯空回我若怕他讓他他益發兇狠我村必受其害要知他的黨與多不過十餘人少者數人我以合村合團之力禦之他雖很亦不過一壯丁耳非有三頭六臂本領他有洋鎗刀矛我以衆人之鎗銃刀矛禦之何至敵他不過格殺又可無論何懼怕之有如此常常設想則膽氣自壯奮勇無前矣

以上各條前五條多見於頒發保甲章程中茲復詳細申明之後二條專爲守助而言均切而不泛簡而易辦只資民力不費民財務宜迅速遵行自相保衛此外如有因地因時應行變通之處是在該團總團

長等公同商議稟請地方官察核詳辦以期有利無
弊永遠奉行用副本部院保衛民生之至意切切特

諭